

Самаңа тайты емаң хатл

Там ванан Пулцавта шеңк ар вулы тащ павиты ёх па мояң хоятат ёхтыдысат. Тадаң кат хатл сус рахас касты, щутцаты, каш верты па уйтантаыты.

Ай кер тылаш 21 хатадна алаң элты елта ёхтам вулэң ёх па мояң хоятат касты лота-та ханшалтысат. Каш верты, щутцаты па касты лотат Пулцават вош калнаң Полябта ёхан хоца верман вусат. Катхосьяң щёс элты па етна унты ун концерт эталтыса, хоца шоши па елта ёхтам мояң хоятат туса арысат па яксат. Щиты, Ёмвош мув элты Вера Кондратьева ёхтыдыяс. Лув ханты ардал шеңк туса арысды.

Туса па хорамаңа ёнтасты нэңат верытсат эталтыты муй хорпи сохат лув лэщатсат. Нэман мет хорамаң сохат тусат: сахат, молцаңат, порхаят, тупрат па ваят. Иса муй аня хорамат альсат. Аратл 85 хоят хантэт, урт па саран рутат элты сохлад эталтысдал.

Нэман Овс мув шимлаң рут мир хоятат кеша «Сенгакоця» нэмпн фестиваль-конкурс верыдыса. Щита хоятат эталтысат па альсат хоты лув арыдат па яклат.

Вулэң ёх хорамаңа лэщатом ёш ухалдал па нэңат ухалдал эталтысдал. Аратл 26 вулэң ухал онас иты картман лойсат. Жюри лувелаң яма вантсалаң па мет тус ухлат мойлапса шитсат. Ёх кутна Вячеслав Лаптандер мойлапса вус, нэңат кутна па Анжела Лаптандер. Касапса спонсор автошкола «Регион 89» элты нэман лэщатом мойлапса Матрёна Ледкова ёша павтас.

«Ма хувн нумас тайсам уталтыты сэвс тайты па машинаян яңхты. Шеңк тынаң, 50 щёрс молтас солкува мосал. Ин па аматсам,



Хор: Иван Сандрин

там сертификатэм щирн тынды уталтыты питдам. Вулы хот элты воша ёхатдам па машина лэлапдам, вердам верты яңхдам. Шеңк ям!», – Матрёна Васильевна ястас.

Щи тумпина шеңк ар тынасты лотат лыщатысаят. Муй наңен мосас, щит рахас лутты: лэтог элты ухлат унты. Лорвош район ёх кат ялап ухал тынысат. Хот лаңкты пунаң нюкет ищи сараласаят.

Вулэң ёх касапса мет такан лавадса, ванты хоят лэдамтыты лота артан вана хатсат. Касапса хоты манал, щит элты мир доватан уйтты комментатор потартас – Дмитрий Губерниев. Касапса щи питас. Олаң хатадна 45 ёх хоят лэдамтысат, кимет хатадна па 20 нэ хоят кассат. Касты юшел щёрс ветсоткем метра.

Вулэң ухадан касман:

Ёх кутан местиат тамиты питсат:

- 1 – Василий Лаптандер (Лаборовая);
- 2 – Александр Тайбери (Аксарка);
- 3 – Михаил Лаптандер (Лаборовая).


Нэңат кутан местиат тамиты питсат:

- 1 – Нина Лаптандер (Аксарка);
- 2 – Валентина Вэнэнго (Аксарка);
- 3 – Зинаида Канева (Надым).

Щиты, мет тынаң мойлапсаят – «Тайга» нэмпн лонщхоп па 300 000 солкува Кев сыд вулэң ёх патан тусдал.

Тадаң хатл сус мояң хоятат самлаң вохты питсаят. Щишн щи ураңна тадаң кат хатл сус камн лэтоган лэщатысаят. Олаң хатадна няр нэхайна па каврам нэхи латна хоятат лапатсаят. Кимет хатадна па нярхул нэхарса па худ элты хошъяиңк каварса. Ищи хатадна шеңк ун ланты пут вулы нэха элты каварса. Аратл 500 литра лат этас. Лэлды нэмолды хоят ант хашас. Иса ям нумасна па латаңа емаң хатлэв постасэлдв.

Иван Сандрин
ханшам потар



Монщат, доңалтопат уятты хоятат касапсая вохлайт

Там тыдащ хусмет хатл вуш элты Овс мув шимлаң мир верат туңматты щиран рупитты департамент касапсаята пилтащты рахал. Ас нопатты тыдащ нийлхусмет хатл унты мосты нэпекат китты кум шитты мосал.

Тамаш касапсайт верыдыты порайн, аратад мир уйтты питал, муй хорпи ошаң-щацаң па ясаң, доңалтоп, монщ муй па йис потар яма уйтты хоятат хонна муң кутэван улдат. Щи веран ун онтас кашң хоят унты ёхатал. Мосаң па, тамаш касапса юпийн матты отэв ищи даңхаты питла, лув хулдыйм монщал, потрад елды мир пал унты туты.

Там касапсаята – «Душа народов Ямала» па «Семья народов Ямала» йи хоят па хоттэлэт пилтащты верытлат. Нэпекат китты порайн тата ант вантла, камн тала наң йисан. Щишан, хой номас тайл, кашң хоят пилтащты верытал.

Касты верытлат щи хоятат, хой монщ-ар акатад, монщал-арыйл па елды мира сэм-пал унты тул. Туп конкурса питты ураңан, мосал матты рупата элты (юридическое лицо) мохты мосты нэпекат китты. «Ямал



Хор: Людмила Гурьева

хоттэл» номинацияйн каслат щи хоятат, хойтат рута улдат па йис верат, монщат, доңалтопат елды тулат. Нох питам хут хоят, кашң от, ветъяң щёрасан мойлаптала.

Щалта энамты ёхлув, хой 18-35 тада йис, «Лучший авторский проект» касапсая вохлайт. Нох питты кат хоятэв ветъяң щёрас солкувайн ёша паватлайт. Щи ураңан мосал, там елпи талатан постама проектат онтасан фольклор щиран верам рупатайт элты нэпекат китты. Муй щиран па хоты сахат Овс мув шимлаң мир монщаң-араң па ясаң шавиты щиран рупата верла муй па паты унты тувман уса.

Там тал Россия доватан мират ияха пилаңа улты щира постаман ул. Щишан, Овс мув шимлаң мир хоятат армонщ шавиты па елды туты вер ванан тайла. Кашң хоят верытал лув мирала ун онтас верты. Экспертной совет вантты юпийн нох питам хоятат нэмаст ясталайт. Ямал муван кашң тад тамаш касапсайт верыдылайт. Сот молтас хоят нэм округ доватан уйтла.

Мосты нэпекат ЯНАО КМНС департамента китты мослат: 629008, ЯНАО, г. Салехард, ул. Гаврюшина, д. 17. Молты вер щиран там телефон хуват инщасаты: 8 (34922) 6-70-21.

«Ямалица» касапсая лэщатылув

Тампуш «Ямалица» нэмпи касапса ущ тыдащ 13-14-мет хатлатан Пулцават вошан манты питал. Мосты нэпекат ущ тыдащ 10-мет хатл унты китты мослат. Овс мув шимлаң мир хоятат думтамат алидыты пиллайт.

Худам номинаций щиран касапса манты питал. Мет одаңан – Овс мув шимлаң мир хоятат луңан тайты сохлад мира эталтыдайт. Щита рахал ёх хоятат, нэңат па ныврэмат думтамат вантты. Кимет номинаций щиран – там йис щиран ёнтам сохат. Хулмет номинацияйн па – араң-монщаң харата этдыты порайн думтыдыты сохат.



Хор: Людмила Гурьева

Мет тусаңашак ёнтасты хоятат мойлапса ветъяң щёрас элты сот щёрас унты шитты верытлат. «Культура Ямала» сайт хоца щит элты луңатты рахал па мосты нэпекат китты. Щишан тэрматыяты, нын тусдан па апардан мира алидыяты.

Аратад мир там касапса хара вохла, хой наң куш ат улдан, атэл сох ёнтты тус нэ, хоттэл хоятлан, пил нэңдан муй ияха рупитты хоятлан пилан щий пилтащты верытлан.

Луң тут хуратты лэщатыман



Хор: Сергей Зубков / «Ямал-Медиа»

Катлэм тыдащ хацас, хоты луң порая питлув. Щи веран «Ямалспас» ин хоятат рупатая вохал, хой луңан, луңан тут питыдыты порайн нётас. Ньюраман па унтан питты тутат шеңк даварт хуратты.

Ёх хоятат нийлхус тал элты щита рупитты верытлат. Пулцават, Ноябрьск, Тарко-Сале, Тазовской, Красноселькуп па Толька хоца щимащ рупата мощатты рахал.

Лаңхаты хоятат Ас нопатты тыдащ одаңмет хатлат элты щёхар тыдащ унты охан сохаптаты пиллайт. Щеп ох тумпийн хонна премияйн мадайт, хой сот хатад рупитал. Там рупатаел етшатад юпийн компенсация па мада.

Водаң Ляльн удам хоятлув нумалдмиман

Ешаул Водаң Ляльн нох питам хатлэв постаты питлэв. Щи веран хон мувев доватан «Красная гвоздика» акция манты питал. Ун кер тыдащ 10-мет хатл вуш элты ущ тыдащ 22-мет хатл унты.

Там акция манты сыс шитты охат ляль харатан удам хоятата нётоса щира мандат.

Щий пилтащты ураңан мевал пос «Волонтеры Победы», «Дело поколений» па «Молоды душой» хоца улты хоятат элты лутты. Щи тумпийн «Почта России», па карты юш хуват яңхты тутаң хопп, маркетплейсан па щи кеша улты дапкаятан.



Хор: Андрей Ткачев / «Ямал-Медиа»

«Хантэт думтам сохат»

Щимащ нэмпи уйтантапса «Наследие» нэмпи библиотека хоцца Пулцават вошн лэцатыса, хота Надежда Талигина ун потар верас па эталтас, хоты сахат хантэт катра йис элты па ин там улты унты думатты сохат тайты питсат.

Надежда Талигина Щаня мув Тылтам куртан Ас потты тылащ 18 хатад 1953 талн сэма питас. Овкурт интернатан ус па ашкудаян уталтыяс. Щи юпина Пулцавт вош культпросвет училище художественной тахая уталтыты манас. Щалта Москва вошн С.Г. Строганов нэмпи ун художественно-промышленной училище етшаптас. Елды па 1987 талн Пулцавта ёхды ёхтас па культура па искусства училище хоцца энамты няврэмат уталтаты питас. Елды па лув научной сотрудинка Уральской отделения РАН история па археология институт хоцца рупитыяс.

Ай тэдан лаңхас умащ хор ханшты. Ханшам хордалан муң моштадэв сэма питам вошал, яма худ па вой велты хоятлад.

Россия хон мувев доватан, Надежда Михайловна нэмал шеңк вутна щацал па яма уйтда. Шоши ханты мирэв кутн самаңа тайла. Лув ханшты юхна хор ханшты нэ, этнограф, кандидат исторических наук, мастер декоративно-прикладного искусства па член Союза художников России нэмат



тайд. Ултад хуват ар юр понас ханты ай мирыев кеша.

Етна пелка, айкер тылащ 18 хатадн, лув самаңа тайты верд элты ёхтам хоятата лүңтас, аляс па потар-тас. Лэцатом потрал

тусды, хоты ханты хоятлүв

йис пора элты лувел сох ёнты питсат па муй элты щи сохат лэцатыслад. Лув хорн эталтас хоты хащм сот талэвн ёнтам сохат ханшина хорамтыты питсайт. Щалта па ин хоты умащ вантты хорам ханшет Овс мувев хуват елды Молм

щарс педат хатты питсат. Ванты, ханты эвидув ур ёх сая манты питсат, сишна хорам ханшет елды мантсат. Щит элты па уйтты мосал.

Ошаң потар юпина мояң хоятат кимет паты хота библиотека хоцца лоңксат. Щита вантопса пуншса, хота рахас ханшам хордал ванттыя. Ханшам хордал «Якты хот» элты альдат. Хордал хоты емаң харна

каматса хатл «Апцев» ещал пойкащла па лув урчална каш верда па порыдыла.

Ёхтам хоятат шеңк умащдыман худантсат па вантсат. Щикем ар хоят ёхтас, омасты таха антом вус, хоятат лойман худантсат. Тамащ ошаң ясчат худантты ай няврэмат па ун хоятат ёхтыдысат, иса хой ханты йис улапса элты уйтты лаңхал. Хой ант ёхтыдыяс, «Якты хот» вантопса айкер тылащ соханты унты вантты рахал. Ёхтыдыяты там адрес щирн: библиотека «Культурный центр «НАСЛЕДИЕ», Пулцавт, Свердловта нэмпи вошхул, 14 хот.

Иван Сандрин ханшам потар



Хор: Иван Сандрин



Хор: scbs.yanao.ru

Пулңаватна вулэң ёх емаң хат па латаңа

Касапса щи питас

Талаң кат хатл сис касапсайт мантсат. Там Овс мув шимлаң рут мир ёх касапса кашң емаң хатална йис тэдна верыдыла. Ёх хоятат лув кутлална юрацлат, нэңат па мояң хоятат увман такан вантлат.

Ямал мувев ловат элты арпелак касты ёх Ямальной па Кев сыл районат элты усат.



Кашң касты щирна олаң местаят тамиты питсат:

Касапса	Хоят	Вош	Муй арат/щёс щир
Этнобиатлон	Юрий Лаптандер	Охсарвош	1 км – 3 мин 06 сек 24 хоят кутан
Ухал шоппи наварты	Сергей Лаптандер	Яр-Сале	200 пуш 15 хоят кутан
Щакадыман юрацман	Яков Яптик	Яр-Сале	53 хоят кутан
Ёх вулэң ухална	Василий Лаптандер	Лаборовая	2 км – 2 мин 45 ухал кутан
Тынцаң сува ёвалман	Сергей Лаптандер	Яр-Сале	17 пуш 60 молтас хоят кутан
Худам пуш навармиман	Виталий Вануйто	Яр-Сале	9,95 метра 33 хоят кутан
Юх катна талман	Лев Езынги	Яр-Сале	64 хоят кутан
Нэ вулэң ухална	Нина Лаптандер	Охсарвош	1 км – 1 мин 18 сек 20 ухал кутан

Мет тынаң мойлапсайт «Тайга» нэмпии донцхопат ёх вулэң ухална касман па щакадыман юрацман мойдасаят. Нэ вулэң ухална касман – 300 000 солдува.



Овс мув хоята мосты порма

Калнаңан шеңк ун тынасты хар лэщатом. Тынасты 120 хоят хон мувев элты усат. Емаң хатла ёхтыдыйм хоятат верытсат мосты пормас, сохат, нэха, худ па вонцамотат лутты. Куртаң ёнтасты нэңат тац лэщатом па татдам вуды па ош сохат лутсат.

Вулэң ёх лувел масат каншсат. Н охшамат вантысат нат каншсат. Ёх кат вантысат, нюк ураңна каншсат. шеңк мосты арс



лутсат. «Ма Казым во он Ёмвош элты ханты кешет в Щи урңа нэман ты хот тайдам. хон мувев лова тата емаң хатал лутсат вулэң ёх Пяк.



Хор: Иван Сандрин

Хорам вулэң ухлат пирысаят

Алаң элты 26 вулэң ухал онас иты картман Полябта ёхан калнаңн хуват дарыса. Хорамаңа лэщатом ёш ухлат па нэңат ухлат эталтысаят. Щи кеша худам хоят жури элты яма вантсалад па мет тус ухлат пирысат. Ёх кутна Вячеслав Лаптандер олаңа питас, нэңат кутна па Анжела Лаптандер мойлапса шитас. Машинайт сэвс тайты уталтаты ашкула «Регион 89» ищи нэман лэщатом мойлапса юкантас. Щи мойлапса ханты нэ Матрёна Ледкова ёша павтас.



Тал талаң кат хатл умащдыман порылдыса



Там хасям лапат ай кер тылащ 21-22 хатлатан шеңк ар хоят мир доват элты мет ольпаң па хорамаң емаң хатла ёхтыдысат. Аратл 52 щёрс молтас хоят кат хатл сыс Полябта нэмпи калнаң хоща актащисат. Тампуш Россия хон мувев доват элты холна 10 молтас кимет хон муват элты мояң хоятат вусат, щит – Киргизия, Китай, Малайзия, Пакистан, Сингапур, Словакия, Турция, Испания, Италия па па муват элты. Иса ям нумасна ияха уйтантысат, потрэмисат па умащ версат. Шоши па мойң хоятат тащаң ёх улапса вантсат, эплаң лётот умасьдысат, эталтыты хорам сохат, касапсайт вантсат. Щи кеша 50 урхот донщман вус па шеңк ар тынасты па каш верты лотат лэщатман вусат.

сат

ищи мосты пор-
эчат хорам росэң
па ермак сяшка-
па тови сыс сопе-
си сох лак-келлад
Щи тумпина утн
ыр пасты кешет

ш Белоярской рай-
ёхатсам. Хув тэдн
ерман рупитдам.
к лэщатом рупит-
Кешидам Россия
тна тайдаят. Ин
на арпелак кеши
» – ястад Павел



Хор: Иван Сандрин

Эплаң лётот хорамаңа лэщатса

Вудэң ёх емаң хатл сыс касапса верса, хота хойлытас верытас няр нёха па няр худ туса нёхартыя. Ямал мувев доват элты хоттэл ёх ёхатсат. Олаң хатадна нёха лэщатман хут хоттэл ёх касапсая ханщлтасат. Кимет хатадна 9 хоттэл ёх щёхар худ нёхарсат.

Кашаң хоттэл ёх элты ий-ики нёха нёхрантас, ийимел па лувел нётас хорамаңа лэщатты па ана понты. Щи

тумпина лув потарсат хоты лув лэщатысат па холща ёхатсат.

Щи тумпина лётот лэщатты «ШЕФС ТИМ» нэмпи ёх шеңк ун ланты пут вуды нёха элты каварсат – талаң 500 литра – Россия доват рекорд. Щи лат ур ёх нэмн понам – «Намза евэй». Лантэл, камн, ун кев путатн 24 хоятан каварса. Щи юпина кашң хоят лапатса.



Хон мувев доватна уйтты мойң хоятат

Кашң тал Россия хон мувевн тамащ хорам емаң хатлэв элты худла. Щишна кашң тал элты аршак мойң хоятат ёхтыдылат. Тампуш ехтыдысат:

Светлана Кузнецова – теннисистка, заслуженный мастер спорта России;

Вадим Норштейн – кина па театр актёр, «Моя планета» нэмпи программа хоща рупитты ху;

Алла Михеева – кина па те-

атр актриса, арсыр программа туты нэ;

Андрей Малахов – кина хоща арсыр программа туты ху;

Игорь Бутман – народый артист России, саксофонна ёнтты ху;

Дмитрий Губерниев – арсыр касапсаят элты потар туты ху;

Мет олаң Ямал мувев куща ху – Юрий Неёлов – па ёхтыдыяс па умащдыман вантас.



Кадаң ёх вер туты нэ



Хор: Иван Сандрин

Ши лаварт рупата нэчат ищи тулат. Кадаң тащ хотан нэ ки антом, волды лаварт питад – ёх уча хув яңхты ант верытлат. Там потар шупн Олеся Сязи элты ясаң тулүв.

Тунял тал щёхар тылащ олаң хатл элты кадаң тащатан рупитты нэчат ураңна ялап нэм лэчатса – работник кочевого жилища. Ши щирн рупитты нэпека иса ханшман улда, муй нэчатта верты мосал.

Олеся Юрьевна Сязи рупитты нэпекад хоңа ханшман улда – оленивод третьего разряда. Ищиты ин кашң рупитты нэ нэпекладн ханшман улда, хой сельхозпредприятият хоңа рупитал. Шишн нумасты рахал лүв ищи кадаң тащ воштыты яңхдат па ат лавадат. Анта,

лүв хот вер, улапса вер иса лэчатлат. Ийикел тащан яңхтал элты, лаварт рупата иса нэ ёшатн ул.

Сэма питас Олеся Юрьевна Ас потты тылащ 29-мет хатл 1988-мет талн Охсарка вош Кев сыл районан кадаң ёх семьян. Сишн кадаң ёх вер айтэлн торды уйтлалды. Хун пора ёхтас, ашкулдая яңхас. Лүвел етшам юпина мохты ёхлы, антелашел хоңа манас па утлам вер елды туты питас. Имолтыена лүвел уртыты Пётр Антонович Сязи ёхтас. Щиты Олеся Лорвош район педа каслас па инты унты щита ийикел пилан улдатан. Ас нопатты (суюв омасты) тылащ 2008-мет тал элты лүв ООО «Сельскохозяйственное предприятие «Горковское» хоңа рупитал.

Рупатаялн куца ёх лув элтэл иса ям ясаң ястатат. Ийикел кадаң тащ хоңа куңая ул. Катңан нял няврэм тайдатан па энмалдатан: хулам похие па эвие. Тунял, Лорвош район кадаң ёх емаң хатална лүв «чумовой капитал» ёша паватсаңан. Щимац ур хот пормаслад пилн лүвилал мойласа эвиел сэма питам ураңна.

Каркам нэнев кашң пуш емаң хатлатн касты дойдыял па кадаң ухадан лэдамтыял. Щиты, каматса тал хащамн, Питлор вошн лүв ухади навралтыман олаң ме-

ста шитыдыяс. Ши тумпина ар ишканцап нэпекатн мойлаптаман ул: каматса Благодарность районной Дума Лорвош район элты, щалта Благодарность Лорвош район куца мийдымал па Благодарность АПК ЯНАО Департамент элты ищи ёхтыдымал. Тампуш па лүв Почётной грамотайн АПК ЯНАО Департаментан юконтса.

Ат па елды, ищи тамиты, шоши хоятлүв, уратлат. Ат тумтака улдат, ханты йис улапса па ясаң елды тулат!

Иван Сандрин ханшам потар



Хор: Иван Сандрин

ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоңа улты мохета мадайт. Ши тумпийн нэңдала, няврэмдала, аңкидала па ащилала ищи нётопса вуты рахал.



ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

СЛУЖБА ПО Контракту в ВС РФ

ВРЕМЯ ДЛЯ ВАЖНЫХ РЕШЕНИЙ!

Контрактная служба
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибыльщики из других регионов возмещаются затраты на проезд от места проживания до г. Салехарда. В период оформления проживание в г. Салехарде и 3-разовое питание предоставляются бесплатно.

ОБУЧЕНИЕ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННАЯ ВЫПЛАТА
ДО 120 000 Р ЕДИНОВРЕМЕННАЯ ВЫПЛАТА

400 000 Р МЕНЕДЖЕРСТВО ОБРАЗОВАНИЯ
ЗАКЛЮЧЕНИЕ ВОЕННОГО КОНТРАКТА НА ЯМАЛЕ

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО **от 225 т.р.**

Сорашак айкел моңатты ураңан

«Лух Авт» газета кашң лапат йи пуш этлдыл. Тухал ишан, ёхаттал унты талаң лапат хащал. Ши веран, сорашак айкелат моңатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоңа моңаттыты.

Ши ураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понаман елды тулэв, ханты мир ясцев шавилэв!



Пояра мийм эви

Эви ул. Худам ху яйи тайл. Яйидал па хатал верал, па пояр ики духсал хоца па яңхлат, ухал ермак, ухал нуй тутат. Па аньхи ёша матат иса антам. Кат яйл, худам яйл щикуш кашлышак. Ун отчалалан ухал ермакан, ухал нуйн иса тула.

– Апщии, там нацен китам от, духсэн китам от.

«Я, – нумасыйл, – ащем муй духас хун тайс, аңкем муй духас хун тайс?»

– Аңкен духас, ацен духас. – Яйидал ястатат, – аңкен духас, ацен духас.

Имолтыйн щиты яңхидысат, яңхидысат, ястатат:

– Нацен вантты лаңхала, нацен уйтыдыты лаңхала, наң айии, муң пилэван яңха!

Па потарла. Хув потарла, ван потарла. Олаң хоптыел каталда. Худам-няд хоптыйн кирда. Няд хоптыйн кирда, щичанца яйидал вулэң ухал, я, кат яйел пилан вулэң ухалан щичи манал. Ай яйел ёдан хащас. Аньхет ант тулайт.

Яйидал пилан манты питал па ел нёхлад, па пелак хоптэл ил шаншатад. Ястал:

– Муй атам, па муй вевтам уйтдан? Я, ил шантатты.

Щалта па пелак хопты пуңал хоптэл па ил шаншатад. Па нох пухалмалды, ел вошталды, па олаң хоптэл, пуңал хоптэл ил шаншатад.

– Па муй атом, па муй вевтам па уйтал?

Яйдал имолтыйн, – олаң хоптэл ил шаншатад, – яйдал увты щичи питсат:

– Щичи войлан хоты, щичи хорлан хоты, – ястал, – яңхам калтмен, яңхам юшен ант хун уйтсан? Ай эви, наң, таңха, воштатэн антам! Муя ёхи хащаптыдан?

Дув па кашлы па, щичан па ёхи хащаптыйл. Щалта от, юхат яйдалан вохам, вана, яйидалан ухал каткута вуса. Ухал каткута вуса, щичи мантсат.

Хув мантсат, ван мантсат. Вош доват, курт доват ун хот этас. Ун хот этас, карты пушас дыпия щичи дойсат. Пушас дыпия дойсат па еңклар-лонщдал нёлэмадайт па вотэмадайт па ёхи щичи доңдат. Ёхи доңдат, па яйдалан опсыдыты тахая опсалда. Пояр ики духсыел ал шушамтыйл, ал хухламтыйл. Щалта лэты-йинщты пасан верда па лэтыя пасан сура вохдайт. Лэлат-йинщлат, па йинщемал, таңха, па ям! Па йинщемал.



Хор: Любовь Возелова



Щиты йинщематал элты щилта щиты эвийе щичи вояпла. Щичи одал. Кашң хоят керыйл щиты хоты. Щалта имолтыйн нох вердал.

Нох вердал па щичанца: ёшал ермат сохан луматтам, курал ермат сохан луматтам. И холдал, щичи холдал, щичи холдал. Пояр ики духсал ястал:

– Яйидалан, – ястал, – манэма щичи лэщатсайн, манэма щичи юкатсайн. Ин ма элтаем нэмолты холта мантэн антом. Муен холдапталан, муен еслапталан?

Щалта лув ел улмиты, ел холмиты номас щичи вул. Щита ел улмитал, ел холмитал. Монцал лувел хащас.

Хув ул, ван ул. Харнең пеңкпи, сорнең пеңкпи похии тайл. Похийел энамты сыс элты муйл антам, щичитал тула, муйл антам, щичитал тула. Имолты луңа йис, па нэңие ястал:

– Ма ин наврэмем хащидыты довата йис.

– Наң муй, холт лэщаттыдан?

Па хатал пелакан нох килал па лэтот щиты щичи шарытал, щиты щичи верал. Дув щичи элты нэш мувал номасан питса, йиңклар номасан питса. Худам нэ тэл луматты от вул па нэңат пилан щичи манал.

Еша, таңха, мурхаң тахая ёхатлат па еша щаха ил куншемийл, еша ил куншемийл. Йи юх сая, кат юх сая щиты пайтасал. Пилда тайм имидал щичи увлат, щичи увлат. Увман ищиты хащсат. Имидал хащам юпийн щичанца, войдал педа ястал, ворңайдал педа ястал, савнэңдал педа ястал:

– Нын манэм нётаты! – ястал, – ма ащем хайм тащан хотэм, аңкем хайм тащан хотэм номасан питсайм.

Ил омасал, щичи холдал, щичи холдал. Имолтыйн ястал:

– Хулах акем ики, – ястал, – аңки-ащичи таймем порайн ям шанш вой, ям потам вой лавантыдан. Хулах акие, манэм нёта!

Хулах ики ёхтамтас, лув нум пелкадан кат пуш, худам пуш дарыйс. Эви хула: хулах ики ясаң щичи тул:

– Ма муй щичиран мандам, наң щиты щичи юва!

Ин войл муй щичиран манал, лув щиты щичи манал.

Щиты хув манас, ван манас, хораң щахра кимдала ёхтас, войң щахра кимдала ёхтас. Аккайдал апалмийс па пойкасалды, мосалтаслы. Муй верас? Мохилал хоца манал. Нэмолты ампан ант хоратла, нэмолты ант хоратла. Нэңат ухалд ёхтыйл, аңкел хайм, ащел хайм оңат нарэпал вул. Ай яйл хайл, ай аньхал хайл. Ун яйл, ун аньхел ёш ловдал шуппи сэңксалды, ястал:

– Уталсаты, – ястал, – хоят кашл антам тумпийн хоят хоца лэщатты!

Мария Андреевна Муратова монцас
Любовь Возелова нэпека лэщатсалды

Самлэх-пэллэх пырэс икихэн-имихэн

(Олаң шупал № 12 луңталн)

Иа, алэң ванчана, пөчана қөтөл, иминам һавмилэл:

– Пөңөл вәлэ йәч энәл кәв қөттү? Ту энәл кәвлиңки мантэм мосәл.

Ими һавмилэл:

– Кәш пөңөл вәләнә тэтты вәлэ.

Тәқа ту кәв лүванә тәх күч һәрәмтәтәх, лайәм, көчөх лөвөтә энәл кәвлиңки вәлл. Тәм энәл кәвлиңки тәқа қөнәла қәтлөхлөлтәх. Тәми айнам қөнәл лөвөт. Таңха-пә қөнәл киңта қөх. Пухлөла вәйөхлөтәх, тәми тәқа айнам пухлөл лөвөт. Ими һавмилэл:

– Нүң қөты йәхилән? Ти кәв қөты вәрийәлэ?

Иминам йәстәл:

– Нүң ләңқлөх вәла!

Тәқа лүвнә айәлта йәрнасәл ләхпинам пытәрлөтәх. Ту пөңөл кәв, тәми қөнәл лөвөт. Тәми қөнәл улты, мавлөл-учөлнат өнтөпөл тәми айнам ту кәвнә айнам мälәккә вәйи. «Тәми мүй өнтө йәм, – өнтөлнә нөмәқсәл, – ма вәлэ ту вохтам сохит аңтөп тәй йәчәнам қөнпәтам тәхнам кирәхтәләм».

Тәқа, әй мөта латнә қутөл ләхпинә омәстәл сохит йәмнам алхәмәхәлта ти йәх. Ти мөта-пә төрәм пәтә, аңкәнөш тәқа! Ими қоләх йәмнам нөмөн алта ти вәри. Әй мөта латнә қот қөн ивәл ту кәв патәлил-учөлнат кәмнам ти туви. Ими күч лүкиләх:

– Ичәк төрәм пәтә нүңаты күч йәстәм, ал мөна! Нүң тәми қөты йәхән, нүң сәмты ту қота ти йәңқилән. Аһлөң ура ти йәхән, – ими викитәхәлмин, йисәлтәхәлмин, тәлөмтәхәлмин.

Иминам йәстәл:

– Ал виҳа, ал виҳа! Ал тәрәхлә!

Имил лүваты күч көтхәл-күрхәла лүкиләх. Қылхәл нөқнам әй пыч туви, қот қөн вәси ивәл. Тәқа әй тәми нөқ питмәла, йух тәйәт нумпийа питмәла, пәлңәт ләра тәми алхәмәлты, тәми имихән-икихән қот йәчәнам. Атәм төрәм пәтәнә вотнә аләмли. Әй сөңнам аләмли. Тит мүй төрәм пәтә, тәқа? Ләйлөтәх, қот қөн йәчәнам тәқа ту төрәм



Хор: Альбина Тыргина

пәтән вотнә аләмли. Қөн пәтал ту йәчәнам тық вормөлтәлтәх. Аңтөп тәй йәчәхә йөвөтмәла, қөн пәтал күч аңтөп тәйнә күч нөрәқинты. Кәв һәсәнтәх, төт пөңөл вәләнә йирнә көрәх.

Аңкәнөш, тәқа, төт пөңөл вәләнә лүльәмтәмәл латнә, кәв һәсәнтәмәл латнә, сәмлөх-пәллөх ики нарқасләтал сохит, тәл лүвнә тәқа чөқсалты. Сәмты-пәлты пөрәққаны мәйи. Пырәс ики әй пыч көпимтәх. Нарқас йухәл көсипи, имилиңки өх лөви қуйи – ләпқөмты панә тәқа мустәм сохит.

– Сәр көта питөттән. Сәр аңкәнөш, нын өнтә ма йөхләм-йөхләм ливиттән, қәли қыңхән, сәр там, ма нынат путына мälләм. Мант хонна нын лита нәмләхтәхлөттән. Ит сәр көта питөттән.

Тәқа, нарқәсийух лүвнә илө ләвәмты, қот пәлө йәчөхә. Тутәң көлат нарқаслөта йәх:

– Имәм тәхә рөмәса, тәхә қөмәса!

Тәми имил вотәң-пәләң пәвөттә ләви, тәттәң-пәләң пәвөттә ләви, ими қот қөн йәчәнам әй сөңнам аләмли. Қот қөн йәчәнам йәқәнам көрәхта йәхмәла латнә әй пуш лүктәх, панә ыл лүңтәмтәтәх.

– Нүң ишшө мантәмнам йәстәлән, қөлнам йәңқлән. Ма йөхләм-йөхләм ликкән, хонна минат лита йөхлөккән, – иминам йәстәл. – Мүй йәмхә сәр нөқ йәста! Сәх пөнәми ыләнам ал мөна! Йәмнам вәр вулөх минат тә ликкән өлаң. Сәр ит көта питхән. Мин линам аңтөп тәйә вәрлөмән. Қөлнә ма йөхләм-йөхләм вәрләл. Әй тәхәнә, ма линам аңтөпә вәрлөм.

Иминам йәстәл:

– Өңқйух тәвлөк вөйә! Ләпәт пәлңәп, қут пәлңәп энәл сорәт-учәт айнам вөйила! Аңтөп кәтлөмтә! Сәр мин линат вохлөмән. Мүй арит вөнт вөйөх-қул, мүй арит қәнтәх қө қөлнә ликкән-төйхән. Мин линат әй тәйәң аңтөп тәйә вохлөмән. Сәр ымситтән!

Тутәң көлат ими қоләх кәмнам мөн.

– Ма линат сәр ти аңтөпин тәйә вәрлөм.

Иа тәқа йәқәнам мөнхән, қутына, панә ими күч йәстәл:

– Қөты йәхилән? Әнтә мөта қөты йәхилән? Өңқйух тәвлөка пә ал вәтихтә, әнтә литә тәйтә өтхә йәккән.

– Аңтөпә нөқнам китлэ, қот қөнам!

Иминә аңтөп нөқнам китли тәқа, тутәң көлат нарқаслөта йәх:

– Сәмлөх-пәллөх пырәс ики, тәхә рөмәса, тәхә қөмәса!

Вотәң-пәләң пәвөттә ләви, тәттәң-пәләң пәвөттә ләви, пырәс ики, молмаш ики әй пыч аңтөп тәйнә қәләкинты. Лүв, қот қөн тәйи йәчәнам әй пыч аләмли, әйпә күч көрәхтахәл, көрәхтахәлнә мүй йәмхә күч питәл. Әй пыч ти қөнтхә һәримты. Тутләт кәм һәримты лүвнә, кәм йәвты. Өс кимөтхә нарқаслөта йәх:

– Сәмлөх-пәллөх пырәс ими, тәхә рөмәса, тәхә қөмәса!

Тәқа вотәң-пәләң пәвөттә ләви, тәттәң-пәләң пәвөттә ләви, тәл аләмли тәқа қот қөн ивәл, аңтөп тәйнә әй пыч қәләкинты, тә қөнтхә һәрәмтәх. Кәм тувхән тукқәл, наңк түвөтәл, қөл түвөтәл түвөтә тәт ти пәнхән пәнхөл. Панә ти имихән-икихән нөпәт қөвит әктәм, пәхтә вөқи, пәхтә һөхәс, мүй туһәң ар тутәт-учәт нөқ вәйләл, йәқә илләл.

Панә тәқа, линнам тәхлөң вөйөх вөхәлта чүксәмхән, күрәң вөйөх вөхәлта чүксәмхән. Әй тәхәнә нарқасләмин панә мүй вөйөх-қул литә качлин питлөхән, әй туминт вөйөх-қул вохлөхән. Ими қоләхсәхән ти йимин-туһиннат итпә вәллөхән.

Аграфена Сопочина
ханшәллы

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнунианца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 77 тз

Подписные индексы:
на год – ПА700, на полугодие – ПР561

№ 13 (1316)

Газета вышла в свет 28 марта 2026г.

Подписано в печать 26 марта 2026г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»

Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунианца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

И. о. генерального

директора

АНО «Ямал-Медиа»

Каврук Татьяна

Ивановна

Главный редактор

Яковлева

Аллина Кирилловна